

Moja  
sjećanja

# Anekdote o Bošnjacima vezane za Kabu i hadž



PIŠE:  
MUHAREM  
OMERDIĆ

## Halal-mal za hadž

U knjizi *Sarajevski nekrologij* rahmetli Alija Name-tak na ironičan način je opisao neke Sarajlije i ne-ke druge iz svog vremena. Na jednom mjestu priča o hadžijama: „Ko ide sa halal-malom na hadž?“

Nametak piše kako je krenula jedna grupa bosan-skih hadžija na hadž. Među Sarajlijama bio i jedan Smajkić iz Podveleža. U dugom putovanju na lađi po-češe razgovarati kako su zaradili hadžski mal. Među njima begova, aga, trgovaca... I ovaj Smajkić, čoban. Begovi zarađivali uzimajući od kmetova, age od du-čana, trgovci od kupovine i prodaje. Upitaše Smajki-ća kako je on zaradio mal za hadž? On reče da je bio čoban, čuvao ovce, strigao ih i vunu prodavao, kupio sir i slao ga na pijacu, i maslo je kupio, poneko janje i od toga štedio. Jedan iskren hadžija mu reče: „Alla-hu a'lemu, tvoj je hadž kod Allaha kabul, a nas osta-lih - da Bog da!“

## Odgadanje odlaska na hadž

Jedna grupa ahaba sarajevskih trgovaca na jed-nom sijelu dogovoriše se da zajedno odu na hadž. Odrediše godinu svoga polaska. Kada dođe to vrije-me, jedan udavao kćer, drugi još otplaćivao kupljeni dućan, a treći bio slab. Ostali rekoše da neće bez njih, odgodiše putovanje i dogovoriše se da krenu slijede-će godine. Dogodine neko od tih ahaba ponovo je bio spriječen nečim, pa zbog njega ponovo odgodiše za narednu godinu. Počeše umirati, jedan po jedan, a preostali živi nastavili odgađati. I tako bi, svi pomri-ješe i ni jedan od njih ne ode na hadž.

## Bošnjak obnavljao Kabu

U doba sultana Sulejmana u Mekki je živio jedna alim iz Bosne. Pored velike učenosti bio je vrstan zi-dar i majstor. U jednoj od tih godina pala je velika ki-ša na Mekku pa je Kaba više dana bila poplavljena, sa nivoom vode i do dva metra. Dva su se zida obrušila pa se tražio način njihovog obnavljanja. Taj naš učeni Bošnjak otišao je emiru Mekke i molio dozvolu da on obnovi te zidove svojim rukama i novcem. Emir mu je rekao da će o tome obavijestiti sultana i tražiti nje-govu dozvolu. Dozvola je nakon nekog vremena sti-gla od sultana i taj naš sretnik je ovjekovječio svoj va-kuf u samoj Kabi.

## Gledajući u Kabu na nogama proučio hatmu

Hafiz rahmetli Mahmud ef. Traljić, pričao mi je da je u Sarajevu bilo više hafiza koji nisu ozvaničili svoj hifz. Spomenuo mi je imena nekih od njih. Među nji-ma je bilo trgovaca, alima, običnih džematlija. Za jed-nog od njih mi je kazao kada je otišao na hadž da je, po ulasku u Harem u Mekki, odabrao pogodno mje-sto gdje neće nikome smetati, stojeći na nogama i ne skidajući pogled sa Kabe proučio je hatmu bez preki-danja.

## Maltretiranje hadžija u Beogradu i smrt reisu-l-uleme Sulejmana ef. Kemure

Pričao mi je rahmetli Zijo Dobojač, vozač rei-su-l-uleme Sulejmana ef. Kemure, šta je bio sevep

smrti ovoga reisa ef. 1975. godine. Kaže da je te godi-ne odvezao reisu-l-ulemu na Surčin, aerodrom u Be-ogradu, kako bi on lično dočeka i poselamio hadži-je. Tada je bilo dozvoljeno da samo JAT može prevo-ziti hadžije i to sa surčinskog aerodroma.

Kada je reis ef. vidio šta srbijanski carinici rade hadžijama, hadžinicama skidaju mahrame, hadžija-ma odmotavaju saruke, skidaju odjeću, izuvaju obu-ću, kopaju po stvarima i istresaju sve iz kofera, odu-zimaju im kupljene poklone i odmjeravaju kazne za neke ponesene predmete, ušao je ljut u salu i prote-stirao. Jedan carinik mu je drsko rekao: „Šta ti 'odža 'očeš ovdje? Ko si ti? Izlazi napolje!“ Reče mu da je on reisu-l-ulema muslimana u Jugoslaviji i da je nedo-pustivo to što carinici čine hadžijama. Tada je šef ca-rine povišenim glasom prisilio reisa ef. da izađe van pokazavši mu prstom na vrata. On je izašao i rekao Ziji da ga vozi u Sarajevo. Od Beograda do Sarajeva, priča rahmetli Zijo, reis ef. nije ni jednu riječ progovorio. Navečer je preselio na Ahiret.

## Hafiz Sinanudin ef. Sokolović sa ocem hafizom Junuzom ef. na hadžu

Hafiz Junuz iz sela Sokol, kasaba Ru-do, kadiluk višegradski, alim stambol-ski, studirao je u Stambolu islamske na-uke. Nakon povratku u Bosnu oženio se, zaposlio kao imam u Priboju i rodio mu se sin Sinanudin koji je sa tri godi-ne ostao bez majke. Za Junuza ef. se go-vorilo da je dobar. Te godine kad mu je umrla žena, otisnuo se na hadž noseći si-na Sinanudina na leđima, jer ga nije imao kome ostaviti na brigu.

Interesantne su zgode i susreti sa ovog njegovog putovanja. Vraćajući se sa hadža u Medini je postao turbetar Posla-nikovog mezara. Plaću je primao iz vakufa svoga prapradjeda Mehmed-paše Sokolo-vića. Kad su se Osmanlije povukle iz Ara-bije, Junuz ef. se sa sinom vratio u Stambol, a potom u Bosnu. Stigavši u Sarajevo postavljen je za imama na Kobiljoj Glavi i šejha Nakšibendijske tekije u Vogošći. Sin mu Sinanudin postao je hafiz, imam, kadija, popularan vaiz, pisac i jedan od naj-boljih profesora fikha Gazi Husrev-begove medrese. Meni je predavao osam godina. Na času bi nam pri-čao da ga je otac na leđima u sepetu odnio na hadž kada je napunio tri godine, da ga je ujela škorpija dok se bos igrao u pijesku i da ga je od otrova izliječila jedna beduinka.

## Nije mi dao u autobus na Mini, a ja ga poslao na studije

Nakon Arefata, Muzdelife i prvog bacanja kamen-čića na Mini naše hadžije su ili išli u Harem ili u hot-el. Bilo je obezbijeđeno i nekoliko autobusa koji su nam stajali na raspolaganju. Teško sam hodao zbog žuljeva na tabanima, pa sam htio sa suprugom ući u zadnji autobus. Student koji je bio zadužen za našu grupu uređovao je ulazak u autobus i meni ne da-de ući. Jedan hadžija uđe kroz prozor. Bilo je još ne-koliko praznih mjesta, ali mene ostavi na putu, žed-nog, gladnog i umornog. Razmišljao sam idući stopu za stopom niz Minu, kroz kakve ispote musliman mo-ra prolaziti. Ja sam tom studentu osigurao stipendi-ju u S. Arabiji, brinuo se o njegovim papirima i dr., a on, možda ne znajući me lično, uradi tako. Sa njim se nisam raspravljao, a da sam mu rekao ko sam, bio bi, sigurno, drugačiji. Znam i danas ko je to bio, pone-kad se sretnemo, ali mu nikad nisam ispričao tu zgo-du sa hadža iz 1990.

Još jednu pouku iz tog dana nosim u sebi. Zau-stavio sam se na jednom praznom parkingu gdje se

## Hodočasnici oznojeni i uprašeni žure na Arefat

*Bosanski  
ambasador u  
Saudijskoj Arabiji  
Senahid Bistrić  
ispričao mi je  
jednu zgodu  
kad je rahmetli  
predsjednik Alija  
Izetbegović  
obavljao hadž, a*



*on mu je  
bio u pratnji. Bili  
su u automobilu  
sa pratnjom na  
putu za Arefat,  
pa je predsjednik  
nekoliko puta  
uzdahnuo  
gledajući  
kroz prozor  
automobila  
oznojene i  
uprašene  
hodočasnike  
kako pješače do  
svog odredišta,  
a onda reče:  
„Njihov hadž  
je pravi i po  
vrijednosti  
visoko iznad  
našega!“*

iz velikog kamiona dijelila voda, hurme i još nešto. Sjeo sam podalje i gledao tu podjelu i divio se da-režljivosti dobrih ljudi koji hrane i napajaju hadži-je u ime Allaha. Iz tog mnoštva ljudi odvoji se prema meni jedna mlada crkinja i bez riječi mi ponudi pa-ketić hurmi. Ja sam odmahnuo glavom i ona se uda-lji. To mi kao živa slika stoji u sjećanju i kajanje što joj na dobrotu nisam uzvratilo zahvalnošću.

## U ihramu hadžija duhanio u po Mekke

Pred polazak za Mekku pružena mi je prilika od glavnog vodiča rahmetli prof. Abdurrahmana ef. Hukića da održim vaz hadžijama i dam im uputstva za oblačenje ihrama i ponašanje tokom njihovog no-šenja. Tada sam rekao da se sustegnem od pušenja cigareta, bilo ono haram ili mekruh, jer to je vrsta čejfa, a takva vrsta uživanja sknavi samu svetost ihrama. Prije odlaska na Arefat krenuo sam posjeti-ti jednog šejha, mog poznanika, koji je radio u Rabi-ti. On je više puta službeno dolazio u posjetu Starje-šinstvu IZ u BiH, bio je prijatelj rahmetli dr. Ahme-da Smajlovića i mene je zaduživao da ga pratim. Na tom putu sam sreo trojicu naših hadžija kako šeta-ju po Mekki i sva trojica odbijaju duhanske dimo-ve k'o u Bosni. Poslije selama sam im rekao da to ne trebaju da rade jer su u ihramima, u Mekki i pred odlazak na Arefat. Jedan od njih me ljutito pogleda i reče: „Što si se ti me-ne svez'o? Pusti me na miru i gledaj svo-ga posla!“

Okrenuo sam se i otišao svojim putem kajući se što sam i pored najbolje namje-re povrijedio našeg hadžiju koji i na tom putu neke stvari neće kod sebe da promi-jeni. Nejsje, to sam zaboravio kada sam 1994. pozvan na područje Žepča u je-dan seoski džemat na mevlud. Od akša-ma do jacije se izvodio program, osvjet-ljenje je bilo sa svijećama, klanjali smo jaciju i izašli. Pred džamijom mi jedan kolega imam priđe sa lijepo ostarjelim ocem i pita me: „Znaš li ti, Muharem efendija ovog dedu?“ Rekao sam da ne znam. Reče: „E, ovo ti je onaj hadžija što si ga se bio svez'o u Mekki zbog ci-gara!“ Kaže, to nam je ispričao kad se vratio kući i bilo mu krivo na sebe što te je narezilio i, da bi sebe kaznio, ba-cio je cigare i više nije pušio!“ Hadži-ja me zagrlji, pusti suzu i zatraži hal-lal. Ako je živ ili preselio, činim mu dovu za Allahu-ovu milost i oprost.

## Dvije o hadžijskim bradama

Slušao sam od rahmetli hfz. Sinanudina ef. Soko-lovića kad priča o jednom hadžiji kazandžiji iz Sa-rajeva koji je na hadžu pustio bradu i onda se njo-me kleo i mjestom gdje ju je zaokružio kad hoće mu-šteriju prevariti. Kaže, došao mu u dućan jedan se-ljak i tražio da kupi veliku džezvu za kahvu. Had-žija mu dade prepravljenu staru džezvu i reče cije-nu. Mušterija razgleda, okreće, mjeri, pa reče: „Meni se čini hadžija da ova nije nova već samo okalajisa-na!“ Hadžija će mu: „Tako mi ove brade za koju sam dovu učinio na hadžu, nova je!“ Čovjek povjerova zbog te teške zakletve, plati mu i ode, a hadžija izgu-bi hadž zbog jedne stare džezve.

Moj rahmetli babo Džemil ef. pričao mi je da se za-desio sa hfz. Sinanudinom ef. Sokolovićem, prof. Huseinom ef. Đozom i nekim drugim hadžijama u Istanbulu gdje su noćili na povratku sa hadža, kad se pomoli iz čaršije rahmetli h. Ismet Žiga iz Sara-jeva sa suprugom koja je dotle došla da ga dočeka. Na Arefatu je za bradu h. Ismetu bila proučena do-va, međutim, kad su ga ugledali u Stambolu sa že-nom bio je bez brade. Sinanudin ef. je bio šaldžija, a i ahab sa h. Ismetom, pa reče prisutnima: „Šutite, eno ide hadžija Žiga sa ženom, a nema brade. Mora da mu je žena skinula.“ Kad su se poselamili, Sina-nudin ef. će: „Hadži Žiga, džaba ti bi dova na Arefa-tu za bradu. Gdje ti je sada? Jesi li se prep'o žene, pa je obrijao?“ Na to će mu h. Ismet: „Slušaj Sinanudin efendija, ja se mogu zakleti Allahu na Rozi Mahšeru da sam bradu nosio makar jednu heftu, a ti nisi ni-malo!“ Smijali su se i nije bilo hatera.